



Nuuk, 27. Maj 2016

Matumuuna Inatsisartut suleriaasiani § 37 naapertorlugu apeqqutit imaattut Naalakkersuisunut ingerlatippakka:

- 1. Narsami immiorfiusimasoq Nanoq Beer pillugu suliaq sumut killinnersoq naalakkersuisut nassuiaateqarsinnaappat?**
- 2. Immiorfiusimasoq inatsisit pisussaaffiusut tunngaviusariaqartut unioqqutissimanerai, aammalu unioqqutitsisoqarsimappat soorlu assersuutigalugu,- akitsuutit akileraarutit assigisaalluunniit qanoq unioqqutinneqarsimappat?**
- 3. Unioqqutitsisoqarsimappat qanoq kinguneqartitsisoqassanerpa, soorlu politiinut eqqartuussinikkulluunniit kinguneqartitsinissamik piumasaqarluni tunniussinikkut?**
- 4. Naalakkersuisup sorliup suliassaq akisussaaffigaa?**
- 5. Ilumoorpa Nanoq Beer pillugu suliaq uninngatinneqarsimasoq?**
- 6. Inuiaqatigiit aningaasaleeqataanerat imaluunniit "akileeqataanerat" matumani pineqarmat, ukiullu arlallit suliaq ingerlareersoq sooq ullumikkut suli suliap naammassineqarsimannginneranut patsisaasut ersarissumik Naalakkersuisuniit nassuiarneqarsinnaappat?**
- 7. Inuiaqatigiit piginneqataassuteqarsimaneranni, soorlu Greenland Venture aqqutigalugu, qanoq annaasat annertutigippat?**
- 8. Akileraarutitigut imaluunniit akitsuutitigut allatigulluunniit inuiaqatigiit aningaasanik annaasaqaatigisaat qanoq annertutigippat?**
- 9. Nanoq Beer pillugu suliaq unittoqqunagu aammalu naammassineqarnissaa siunertaralugu naalakkersuisut nukingisaarisimappat?**

(Inatsisartuni ilaasortaq, Aqqaluaq B. Egede, Inuit Ataqatigiit)

Tunngavilersuut:

Ukiut arlalinngorput Nanoq Beer pillugu naalakkersuisut suliamik ingerlatsillutik suliaqarneq aallartimmassulli. Ulloq manna tikillugu assut eqqumiigaara suliassaq kigaalaarunneqartut imaluunniit uninngasutut naammassinngisaannartussatullu paasineqarsinnaasumik inissisimammat. Taamaammat apeqqutit nangittumik naalakkersuisunut ingerlatippakka paasiniallugu naalakkersuisoqarfinni suliassap naammassinissaa siunertaralugu iliuuseqartoqarsimanersoq.

Inuiaqatigiit eqqugaanerat, suliassallu taamaattut kinguneqartinneqartanngippata ileqquuleqqunagu, kiisalu kinguneqartitsisoqanngippat taamatut assingusunik pisoqaqqissagalarpat assigiinngisitsisoqaqqunagu iliuuseqartoqarnissaa pisariaqarmat paasisaqarusuppunga.

Kissaatigaara Naalakkersuisut ullut qulit qaangiutsinnagit apeqqutit akissagaat.